

# INUIT ATAQATIGIIT INATSIARTUNI



UPA 2026/14

Pipaluk Lyngé

23.04.26

## **Nunanut allanut nassuiaat**

(Inatsisartunut ilaasortaq Pipaluk Lyngé, Inuit Ataqatigiit)

Nunarsuaq naatsorsoruminaallunilu nalunartumiippoq.

Nunarput tatisimaneqarpoq, inuiattulli ataatsimoorpugut, sulinerlu sulí ingerlavoq.

Inuit Ataqatigiinnit Naalakkersuisoqataalluta nunatta ataatsimoorfigisinnaasaannut suleqataavugut, nunanut allanut allaveqarnerput ingerlapparput.

Maluginianngitsoorsinnaangilarpulli, nunatta aqunniarlugu tiguarniarlugulu USAmit oqartoqarmat, Nunanut Allannut Periusissiaq ukiuni qulini atuuttussa q 2024imi atsiukkatta qangarnisanngoreersoq. Nunatta killeqarfii ataqqineqassapput, inuiattut ataqqineqassaagut, suleqatigineqarniassatillutalu, nalitut pineqartariaqarluta.

Nunat Avannarliit Killiit ilaasortaaffigisatta, Naalakkersuisuusimasut qinigaaffik kingulleq ilaasarnertik killilerpaat, suleqatigineqassatilluta, ataatsimiinnerup nalaani torsuusami utaqqisinneqarneq naammaginnginnatsigu, peqataatinneqarnissarput naligiissumik, piomagatsigu, maannamut angulersimasarput, Nunat Avannarliit Killiit nalitut ilaasortaanissatsinnut suliaq ingerlasoq.

Suleqateqarsinnaaneq pingaaruteqarpoq, niuerluarsinnaanerlu.

Ukiuni kingullerni marlungulersuni, inuit naapeqatigiittarfiatigut nunarsuarmi politikki ingerlanneqartoq isigaarput, makittaraagut nunarput eqqaaneqarsimasoq, januarimi 2026imi Venezuelap presidentia nulialu USAmit aallarunneqarput, nunarpullu ulluni 20ini qaammatini tulluuttuni marlungni eqqartoqqinneqassasugut tusagassiutitigut eqqaaneqarluni. Taamaammat nunatta aallartitaqarfii, USAmiittut sualummik, ulloq unnuarlu sulipput, nunarput tiguarneqanngikkaluarluni, qanoq anilliarfissatsinnik naaperiaaffeqarsinnaanersugut sulissutigineqarmat.

Naatsorsuutigineqarpoq nunatta persarineqarnera unikkallarunngittoq,

taamaattumik Inuit Ataqatigiinniit Nunanut allanut Naalakkersuisut atorfilittaannut

# INUIT ATAQATIGIIT INATSIARTUNI



qujarusuppugut, qasusuillusi suleqataanissinnut, minnerunngitsumik ilaquataasunut, nalunanngitsumik piffissamik nukinnillu ikorfartuisunut. Suli nukissaqarnissassinnut kissaappatsigit.

Nunatta tatisimaneqarnerani inuiattut ataatsimoorpugut, nunallu suleqatigut, nunat avannarliit, europalu, nunarsuullu sinnerani suleqatigerusunneqarnerput taperserneqarnerpullu ersarippoq. Niuernikkut periarfissat imaaginnavipput, EU aningaasaliineruniarluni nipeqalerpoq, Inuit Ataqatigiinniit qujarupparput, nunatta kissaatai suunersut EU naalaartarmat, USAllu tiguarnialermatigut Eup bazookamik taasartakkani atorniarlugu allaat sinnerluta oqalulermat, Inuit Ataqatigiinniit tuppalleratta, qujallutalu suleqatigerusunneqaratta, aamma Islandimit, Savalimmiunit, Frankrig, Tyskland allarpassuillu, ilaatigut Japanimit aamma suleqateqarnerput Ilisimatusarnikkut isumaqatigiissuteqaratta.

Sillimaniarnikkut nunarput mittarfilersorneqarsimammat, nunatta issittullu suli soqutigineqaleraluttuinnarnerata ilutigisaanik anilliarfissamik Inuit Ataqatigiit pingaartitsisimavugut Naalakkersuisut taperserneritigut, Inatsisartutullu ataatsimiitaliani suleqataanikkut. Issittulerngusaannerulli nunatsinnut aamma iluaqutaasariaqartoq Inuit Ataqatigiinniit isumaqarpugut. Maani tummisut isiginnaaginnartunngortinneqassanngillat. Peqataatinneqassaagut, innuttaasutut, qinikkatut, minnerunngitsumik kommunit pineqartut aamma pineqartillugit. Taamaattumik Inuit Ataqatigiinniit Naalakkersuisut kaammattorumavagut, sillimaniarnerup ineriartortinnerani, illoqarfiit sinerissamiittut inuisa kissaataat naalaarneqassasut, aamma umiarsualiveqarnikkut, ineriartortitsisinnaasunik isiginiaqqullugit.

Inuit Ataqatigiinniit illersornissamut isumaqatigiissutini pilersinneqarsimasuni nuannaarutigarpugut issittumi upalungaarsimanermi Kangerlussuarmi ilinniarfeqalersimagatta, inuusuttatta atorluaqisaannik. Taamak ittut qanortoq amerlilik, kitaani kangianilu sikkerarsinnaasunik, uagut kissaatigut naapertorlugit, avataaniit kissaatigineqartut pinnagit.

# INUIT ATAQATIGIIT INATSIARTUNI



NATOmuk ilaasortaanerput ilutigalugu, nunarput aallartitaqalersimalerpoq, NATOlli siunissaa nalorninartumiittoq Inuit Ataqatigiinniit nalilerumavarput. USAp presidentiata NATO pappiliaannartut isigilersimavaa, USAp Israelillu Iran saassunneratigut NATOmuk ikioqqugaluaramik itarmata, NATO illersornissamut tunngammat, saassussinissamut pinnani. Taamaattumik Inuit Ataqatigiinniit isiginngitsuusaarusunngilarput nunarsuatsinni pissutsit sungiusimalikkatta allanngoriartuinnarneri. Nalimmassarsinnaasariaqarpugut, naaperiaasinnaasariaqarpugut, erfalatorput oqartussaanerput killeqarfigullu pilliutigingikkaluarlugit.

Inuit Ataqatigiinniit Inuit Nunallu inoqqaavisa pisinnaatitaaffii pingaartitaraagut, taakkulu tunaartaralugit Naalakkersuisut sulinissaata sinaakktutigeqqullugit ilungersorluta. Nunani arlaqartuni inuit pisinnaatitaaffii, oqartussaaffii, nunap killingi kalluarneqartut, innarlerneqartut suusupajugineqartullu ukiuni kingullerni takusinnaavarput, allaallumi mobilitsinnit toqqaannartumik isiginnaarsinnaallugit. Nunarsuarmi eqqissiviillortut ikigisassaangillat, illuatungaanili nunat siuttui akiuuttut, Pave eqqisseqqusisoq isiginnaarlugu. Silap pissusaa sukkaoorujussuarmik allanngorpoq, kulturertut innarlerneqarpoq. Inuit Ataqatigiinniilli eqqissineq, suleqateqarneq avatangiisinullu mingutsitsinnginnissamut suleqataanissatsinnut piareersimavugut.

Inuit Ataqatigiinniit nunannaarutigaarput Canadap nunatsinni aallartitaqalernera. Naggueqatigut qanimut suleqatigerusuppugut, qujavugullu ukioq tatisimaneqarnitsinni naggueqatigut ICCmilu ilaasortaqaatitta nunatsinnik tapersersuinerannut. Qamanngavik qujanaq.

Nunatsinni aallartitaqalersimasut EU, Island, USA Canadalu, nunatsinnut ataqqinnineq, naligiittut pineqarnissarput kissaatigaarput. Siulitta sukataarlutik angusimasaat tamaanga killinngilaq, sulilu suliassaqarpugut, siullertulli nunaqqatigiilluta ataatsimoorfigut qitiutittariaqarpugut. Avataaniit isiginnaarpatigut, uagulli suleqateqarusussuserput apeqqutaavoq.